

Ufficio Stampa della Provincia autonoma di Trento  
Piazza Dante 15, 38122 Trento  
Tel. 0461 494614 - Fax 0461 494615  
uff.stampa@provincia.tn.it

COMUNICATO n. 1085 del 23/04/2026

Daz earst di didaktik pittnândar übar di grentzan un näuge didjitàln hilfan. Dar Marchiori khütt: “Gian zuar in djar boda khemmen àhevante von djungen”. Di Gerosa: “Konfrontarnse zbisnen lentar iz eppaz in mearar vor da formatif bakhsun von studjént”

## “Dar Euregio in di schualn” in earst trèff von Erta von Euregio 2026

[Cimbri] ’Z hatta àgeheft in Moggioli Haus, setz von informatzion un koordinamént Àmt von Euregio Tiról-Südtiról-Trentino, da viarte editzion von “Erta von Euregio”. In earst trèff von 2026 hattma geredet übar dar bèlt von schualn, pinn zil nidarzolega näuge didaktik stratedjian vürzovüara statt edukatzion un darzuar bia zo lirna da taütsch zung un bia zo arbata pittnândar übar di grentzan. Dar trèff iz khent augelekk pittnândar von Euregio, pinn Dipartiment Istruzion vodar autonome Provìntz vo Tria un IPRASE, dar hatt gelekk panândar maistre vodar untarschual un vodar mittlschual. In trèff hânda genump toal dar provintziâl asesór zo macha khennen di Autonomì Simone Marchiori, boda hatt gevüart in gruaz vodar asesören Francesca Gerosa. “Vüarn in Euregio in di schualn iz ummaz von earstn sachandarn zo tüana: ’z bill soin gemuant boroatn di näung djeneratziongen zo leba pittnândar, mittzoarbata un zo redase zbisnen in lentar übar di grentzan. Vo da heftma à zo macha aubaksan di zuarkhemmane, àhevante pròpio von djungen un von sèll soin guat von ünsarn lentar zo kreschra pittnândar, nèt auz alumma” asó hatta khött dar Marchiori. ’Z iztada o gest dar schual sovraintedént vodar autonome Provìntz vo Tria, Giuseppe Rizza, boda hatt khött: “Di prodjèkte von Euregio pezzarn daz sèll boda khint gètt von trentinar schualn un darzuar stercharnsa an européan auzseng. Konfrontàrn di schualn sistème, di arbat von maistre, haltn dakunt di meararn zungen un innvüarn näuge didaktike, allz ditza vüart zo maga hâm an pezzarn, öffege un stecharn edukatìf sistèm”. Dar Rizzi hatt darzuar gevüart un gètt vèrt in sèll boda hatt khött di asesören Gerosa, khödante ke, azpe si, er o iz in gântzan dakòrdo pinn ziln boden iz gètt disar prodjèkt. Di Gerosa, defâtte, redante aftna àndra sait, hatt gehatt khött übar disan prodjèkt: “Dar Euregio vor ünsarne schualn iz a konkrètega oportunitét boda gitt zuar zo stechra di zung kompeténtzan, da statt edukatzion un gitt zuar in Lentar zo khennese pezzar tra de se. Di didaktik esperientzan gemacht übar di grentzan hâm an gântz groazan vèrt zo macha krescharn di studjént, machante khennen pezzar di Eurodredjng drinn in an internatzionalegen kontèkst.

In tagung soinda khent gezoaget mearare näuge sachandarn vodar formatif opfar boda mage gem dar Euregio vor ’z schualdjar boda khint. Zo khöda bia bichte ’z soinda dise struméntn hatta genump ’z bort di Elisa Bertò, vortretaren von Trentino drinn in Djeneràl Sekretariàt von Euregio: “Di vorlegom vor ’z schualdjar boda khint soin ettlane, àhevante vo “dar Euregio macht schual” boda iz khent gântz vornaiügart un kheart z’soina vorgelekk pittnan näung portàl online boma vorsteat iantrar un darzuar izta dar näuge prodjèkt “Euregio goes school” vürgevüart pittnândar von Beleschlànt pinn Österraich. Da didaktik opfar machtze hërta mearar dinamisch: dar format “dar Euregio bokhennt di schualn” iz o khent gântz vornaiügart

pitt labör vo project management un edukatìf spiln. Hèrta bichte soinda di partnerschaft augelekk garade zbisnen in schualn, djüste pilèstar boda machan ren tra de se di studjént”.

In zboate toal von tagung hâmda geredet di maistre: mearare vo mearare schauln hâmda kontârt vo konkretege esperientzan gânt garècht azpe di sèlln vo partnerschaft un ândre prodjèkte un stratedjîan zo lirna da taütsch zung, da hâmda darzuar geredet vo mittarbatn gemacht pinn emtar von lentar un von Pakt Dupplzung. Dar tage izzese gemacht verte pittnan operatîf workshop pinn zil zo vorstiana bia 'z soinda drâ zo giana di initiativan un zo prodjèktara pittnândar näuge didaktik struméntn boda bartn khemmen inngevüart in herbestmânat boda khint.

**Foto von euregio**

**Nimm abe in video >**

[https://drive.google.com/drive/folders/13u1QSSPu0R\\_qmZ7\\_z7gRUwZ\\_WAkHjrTH?usp=share\\_link](https://drive.google.com/drive/folders/13u1QSSPu0R_qmZ7_z7gRUwZ_WAkHjrTH?usp=share_link)

**Übarsetzt von Schaltarle vor di zung von Toalkamou vodar Zimbar Hoachebene**

(cdt)